



MALAYSIA

PENYATA RASMI PARLIMEN

Parliamentary Debates

KAMAR KHAS

Special Chamber

**PARLIMEN KEEMPAT BELAS
PENGAL KETIGA
MESYUARAT KETIGA**

K A N D U N G A N

UCAPAN DI BAWAH USUL BERKENAAN PERKARA TADBIR KERAJAAN [P.M. 17]:

- **Kemudahan Balai Bomba dan Pili Bomba
di Negeri Pulau Pinang**
- YB. Tuan Wong Hon Wai (*Bukit Bendera*) (Halaman 1)
- **Isu Permohonan Mendapat Status Penduduk
Tetap Puan Nerlina binti Tarigan**
- YB. Puan Hajah Natrah binti Ismail (*Sekijang*) (Halaman 5)

**MALAYSIA
KAMAR KHAS
PARLIMEN KEEMPAT BELAS
PENGKAL KETIGA
MESYUARAT KETIGA**

Isnin, 9 November 2020

Mesyuarat dimulakan pada pukul 12.00 tengah hari

DOA

*[Tuan Yang di-Pertua **mempengerusikan Mesyuarat**]*

**UCAPAN DI BAWAH USUL
BERKENAAN PERKARA TADBIR KERAJAAN (P.M. 17)**

Kemudahan Balai Bomba dan Pili Bomba di Negeri Pulau Pinang

12.04 tgh.

Tuan Wong Hon Wai [Bukit Bendera]: Terima kasih Tuan Yang di-Pertua. Pada kesempatan tengah hari ini, izinkan saya membangkitkan isu yang berkaitan dengan masalah-masalah infrastruktur yang terdapat di Balai Bomba Bagan Jermal Pulau Pinang yang terletak di bawah kawasan Parlimen Bukit Bendera.

Pihak bomba adalah pasukan penyelamat utama di negara kita dan mereka memainkan peranan yang penting dalam melaksanakan pelbagai operasi menyelamatkan, terutamanya apabila kebakaran berlaku. Kemudahan infrastruktur yang lengkap dan efisien hendaklah diberikan keutamaan kepada ahli-ahli bomba yang bertungkus-lumus melaksanakan tugas mereka dengan baik.

Saya ingin menarik perhatian Yang Berhormat Menteri terhadap Balai Bomba Bagan Jermal mempunyai kawasan operasi yang besar dan perlukan kemudahan yang lengkap untuk melaksanakan tugas mereka. Saya telah mendapati kemudahan di Balai Bomba Bagan Jermal perlu dinaiktarafkan.

Saya ingin memohon maklumat dan maklum balas berikut daripada Kementerian Perumahan dan Kerajaan Tempatan untuk perkara di bawah:

- (i) berapakah peruntukan yang disalurkan oleh pihak kementerian untuk menaiktarafkan kemudahan setiap balai bomba di negeri Pulau Pinang;
- (ii) mohon statistik dan angka projek pembaikan kemudahan pihak bomba yang sedang berjalan atau

telah pun dilaksanakan oleh pihak kementerian pada tahun 2020 di negeri Pulau Pinang;

- (iii) mohon menyatakan bilangan pili bomba di kawasan Parlimen Bukit Bendera dan taburan lokasi dan kekerapan pemeriksaan pili-pili bomba berkenaan; dan
- (iv) mohon pihak kementerian memberi perhatian terhadap kemudahan Balai Bomba Bagan Jermal dan melaksanakan langkah-langkah yang sewajarnya untuk menaiktarafkan kemudahan.

Saya memohon supaya Yang Berhormat Menteri dan pihak Kementerian Perumahan dan Kerajaan Tempatan dapat memberikan jawapan terhadap setiap persoalan yang dibangkitkan di atas. Sekian, terima kasih.

12.05 tgh.

Timbalan Menteri Perumahan dan Kerajaan Tempatan [Dato' Sri Dr. Haji Ismail bin Abd Muttalib]: *Assalamualaikum warahmatullahi wabarakatuh* dan salam sejahtera. Terima kasih Tuan Yang di-Pertua dan terima kasih Yang Berhormat Bukit Bendera di atas keprihatinan tentang perkhidmatan bomba di kawasan Pulau Pinang.

Tuan Yang di-Pertua, jawapan bagi soalan nombor satu. Untuk makluman Yang Berhormat, Kementerian Perumahan dan Kerajaan Tempatan (KPKT) melalui Jabatan Bomba dan Penyelamat Malaysia (JBPM) melaksanakan kerja-kerja menaik taraf balai bomba dan penyelamat bergantung pada keutamaan, keperluan dan keupayaan kewangan. Fokus perancangan diberi kepada 69 buah balai bomba dan penyelamat yang berusia lebih 50 tahun di seluruh negara.

Bagi negeri Pulau Pinang, kerja naik taraf yang telah dan sedang dijalankan adalah seperti berikut:

(i) **Balai Bomba dan Penyelamat Butterworth (2020)**

Kos projek : RM3,300,000.00

Tarikh mula laksana : 17 Jun 2019

Tarikh siap : 6 April 2021

Jadual kerja : 58 peratus

Sebenar : 61 peratus

Agensi pelaksana : KPKT

(ii) **Balai Bomba dan Penyelamat Kuala Muda (2018)**

Kos projek : RM3,000,000.00

Tarikh mula : 10 April 2017

Tarikh siap : 30 April 2018

Tarikh serah : 25 Mei 2018

Agensi pelaksana : Jabatan Kerja Raya

Bagi soalan kedua Tuan Yang di-Pertua, bagi memastikan peralatan dan kemudahan-kemudahan di Balai Bomba dan Penyelamat di Pulau Pinang sentiasa dalam keadaan baik, peruntukan untuk penyelenggaraan sebanyak RM1,565,000.00 telah disalurkan pada tahun 2020 yang melibatkan yang pertama ialah *corrective maintenance* dengan izin, berjumlah RM414,139.78.

Bagi kerja-kerja pembaikan kerosakan di balai bomba seperti pembaikan kebocoran bumbung, tandas, paip bekalan air dalam bangunan dan bawah tanah serta lain-lain. Jumlah projek dan perincian adalah seperti berikut:

PROJEK	JUMLAH PROJEK	PERUNTUKAN	CATATAN
<i>Corrective Maintenance</i>	16	RM414,139.78	Pembaikan kecemasan melibatkan: -BBP Paya Terubong -BBP Perai -BBP Tasek Gelugor -BBP Bandar Perda -BBP Kepala Batas -BBP Bukit Mertajam -BBP Lebuhr Pantai -BBP Bagan Jermal -BBP Balik Pulau -Pejabat Zon 1(Jalan Perak) -BBP Bayan Baru -BBP Tasek Gelugor -BBP Sg. Bakap -BBP Lebuhr Pantai -BBP Bayan Baru -BBP Jalan Perak

Bagi *preventive maintenance* iaitu kontrak penyelenggaraan berkala iaitu Sistem Elektrikal, Sistem Mekanikal, Sistem Pendingin Hawa dan Sistem Lif melibatkan Ibu Pejabat Bomba Pulau Pinang dan 20 buah Balai Bomba dan Penyelamat yang lain yang melibatkan RM250,860.22.

Bagi kerja ketiga ialah pembaikan kuarters – RM900,000.00 melibatkan tiga buah kuarters di Balai Bomba dan Penyelamat Perda, Balai Bomba dan Penyelamat Teluk Bahang dan Balai Bomba dan Penyelamat Tasek Gelugor.

Jawapan bagi soalan ketiga Tuan Yang di-Pertua dan Yang Berhormat, bilangan pili bomba di kawasan Parlimen Bukit Bendera di bawah jagaan Balai Bomba dan Penyelamat Bagan Jermal dan Balai Bomba dan Penyelamat Paya Terubong adalah sebanyak 1,331 unit. Taburan yang terdapat di Parlimen Bukit Bendera adalah seperti berikut:

Bil.	Kawasan	Jumlah Unit
1.	Tanjung Bungah	554
2.	Pulau Tikus	318
3.	Kebun Bungah	176
4.	Air Itam	200
5.	Padang Tembak	38
6.	Bukit Bendera	24
7.	Jalan Air Putih	12
8.	Kg. Melayu	9
Jumlah		1,331

Pemeriksaan pili bomba dilakukan sekurang-kurangnya setahun sekali bagi setiap unit. Pada tahun 2020, jumlah pemeriksaan yang telah dibuat adalah sebanyak 1,331 kali iaitu sekali bagi setiap unit pili. Hasil pemeriksaan mendapati sebanyak 15 buah pili bomba telah rosak dan daripada jumlah itu lima buah pili bomba telah dilakukan penyelenggaraan melibatkan kawasan Kebun Bunga, Jalan Macalister, Jalan Tengku Abdul Rahman, Lebuhraya Corington dan Jalan Air Putih. Manakala baki 10 pili bomba akan dilakukan penyelenggaraan berdasarkan agihan peruntukan tahun 2021 mengikut keutamaan.

■1210

Bagi jawapan keempat Tuan Yang di-Pertua, untuk makluman Yang Berhormat, kementerian memberi keutamaan terhadap pelaksanaan naik taraf Balai Bomba dan Penyelamat yang berusia lebih 50 tahun melibatkan 69 buah Balai Bomba dan Penyelamat di seluruh negara. Balai Bomba dan Penyelamat Bagan Jermal merupakan salah satu daripada tujuh buah balai bomba di Pulau

Pinang yang telah disenaraikan untuk dinaiktarafkan dalam Rancangan Malaysia Ke-12 (RMKe-12). Namun begitu, kerja-kerja naik taraf ini bergantung kepada peruntukan kewangan yang diluluskan dan kriteria keutamaan yang telah ditetapkan.

Kita mengucapkan terima kasih kepada kerajaan kerana membentangkan bajet baru-baru ini Tuan Yang di-Pertua. Walau bagaimanapun, penyelenggaraan kemudahan di Balai Bomba dan Penyelamat Bagan Jermal telah dilaksanakan seperti berikut:

- (i) penyelenggaraan berkala bagi Sistem Elektrikal, Sistem Mekanikal dan Sistem Pendingin Hawa di sepanjang tahun 2020 di seluruh negeri termasuk Bagan Jermal ialah berjumlah RM250,860.22 dan RM577,491.30. Penyelenggaraan telah dilakukan pada tahun 2019; dan
- (ii) pembaikan kerangka bumbung dan tiang telah selesai dilaksanakan bagi tahun 2020 dengan kos RM19,500.00.

Terima kasih Tuan Yang di-Pertua.

Isu Permohonan Mendapat Status Penduduk Tetap Puan Nerlina binti Taringan

12.11 tgh.

Puan Hajah Natrah Ismail [Sekijang]: Terima kasih. *Assalamualaikum warahmatullahi wabarakatuh.* Tuan Yang di-Pertua, saya ingin menarik perhatian semua berkaitan isu permohonan kewarganegaraan yang telah dikemukakan oleh Puan Nerlina binti Tarigan yang berwarganegara Indonesia (No. Pasport: C3816808).

Untuk makluman, status Puan Nerlina di Malaysia kini ialah pemegang Pas Lawatan Sosial Jangka Panjang sejak tahun 2003. Permohonan demi permohonan telah dilakukan, namun sehingga kini beliau masih belum lagi mendapat taraf penduduk tetap. Saya perincikan perjalanan hidup beliau daripada awal permulaan masuk ke dalam negara sehingga kini.

Puan Nerlina telah masuk dan bekerja di Malaysia bermula dari tahun 2003. Beliau telah berkahwin dengan seorang lelaki warganegara (No. Kad Pengenalan: 540914-01-6189) pada tahun 2010 dan dikurniakan seorang anak perempuan pada tahun 2013. Dalam kes ini, anak beliau secara automatik telah mendapat taraf warganegara Malaysia. Pada tahun 2017, suaminya telah

meninggal dunia dan sehingga kini Puan Nerlina terus tinggal di Malaysia untuk membesarkan anaknya yang bertaraf warganegara.

Oleh itu, beliau terpaksa memperbaharui Pas Lawatan Sosial Jangka Panjang setiap tahun dengan seorang penjamin warganegara. Beliau juga pernah mengemukakan permohonan bagi mendapatkan status Penduduk Tetap (PR) di Pejabat Imigresen Johor, namun permohonan tersebut gagal. Pegawai Imigresen juga ada memberikan cadangan yang perlu diambil bagi membolehkan permohonan ini diluluskan dengan cara Puan Nerlina perlu berkahwin semula dengan lelaki warganegara.

Persoalannya, adakah dengan mempunyai anak yang berstatus warganegara tidak layak untuk beliau mendapat taraf warganegara secara automatik? Puan Nerlina mempunyai pelbagai kekangan dalam hidup sepanjang beliau tinggal di dalam negara. Antaranya, beliau tidak layak memohon bantuan ibu tunggal daripada mana-mana agensi kerajaan seperti JKM, pejabat agama dan lain-lain serta tidak boleh membuka akaun di mana-mana bank tempatan bagi urusan kewangan.

Oleh yang demikian, saya mohon agar pihak kerajaan dapat mempertimbangkan permohonan beliau dan memberikan cadangan yang sewajarnya dalam mendapatkan status penduduk tetap kerana beliau sememangnya tidak lagi berhasrat untuk pulang ke negara asal. Sekian, terima kasih.

12.15 tgh.

Timbalan Menteri Dalam Negeri [Tuan Jonathan bin Yasin]: Yang dihormati Tuan Yang di-Pertua. Ini jawapannya Yang Berhormat Sekijang, pengeluaran Kad Pengenalan Pemastautin Tetap (MyPR) oleh Jabatan Pendaftaran Negara adalah berdasarkan kepada sub Peraturan 5(3)(b) Peraturan-peraturan Pendaftaran Negara 1990.

Bagi mendapatkan MyPR, pemohon perlu mempunyai pasport yang sah dan mempunyai permit masuk yang dikeluarkan oleh Jabatan Imigresen Malaysia. Untuk makluman Ahli Yang Berhormat, pemberian permit masuk kepada warga asing adalah selaras dengan peruntukan di bawah Seksyen 10 Akta Imigresen 1959/63 dan Peraturan 4 Peraturan-peraturan Imigresen 1993 yang memperuntukkan kuasa kepada Ketua Pengarah Imigresen untuk mengeluarkan permit masuk berdasarkan syarat dan prosedur yang ditetapkan.

Kategori individu yang dikecualikan daripada larangan kemasukan di bawah Perintah Imigresen Larangan Masuk 1993 dan layak diberi pertimbangan pemberian permit masuk adalah seperti berikut:

- (i) individu yang memiliki kelayakan profesional atau kepakaran yang boleh membolehkan beliau memberikan perkhidmatannya di dalam negara tanpa menjejaskan kepentingan warganegara sedia ada;
- (ii) individu yang memiliki sijil yang dikeluarkan oleh Menteri mengesahkan kemasukannya adalah untuk kepentingan ekonomi negara;
- (iii) isteri dan anak-anak berumur di bawah 18 tahun kepada sesiapa yang dibenarkan masuk di bawah golongan di para (a) dan (b);
- (iv) isteri kepada warganegara Persekutuan yang tidak pernah tinggal berasingan dengan suami beliau untuk tempoh lima tahun;
- (v) anak berumur bawah 18 tahun kepada warganegara Persekutuan; dan
- (vi) individu yang dibenarkan oleh Menteri untuk masuk Persekutuan atas belas kasihan.

Berkaitan dengan permohonan pas residen. Puan Nerlina iaitu subjek kini berstatus balu kepada lelaki warganegara Malaysia. Maka subjek tidak termasuk dalam kategori individu yang boleh dipertimbangkan pemberian permit masuk. Namun begitu subjek telah memohon kemudahan pas residen. Selaras dengan Peraturan 16A Peraturan-peraturan Imigresen 1993, pas residen membolehkan subjek itu tinggal dan berada dalam negara dalam tempoh lima tahun.

Selain dari itu, subjek dibenarkan untuk belajar, bekerja atau menjalankan aktiviti perniagaan tanpa perlu memohon atau menukar kepada pas-pas lain.

Tuan Yang di-Pertua, anak kepada subjek bersama suami bertaraf warganegara memperoleh taraf kewarganegaraan Malaysia mengikut kuasa undang-undang di bawah Perkara 14(1) Perlembagaan Persekutuan yang memperuntukkan individu yang dilahirkan di Malaysia dengan salah seorang ibu atau bapa mereka adalah warganegara Malaysia layak dianugerahkan kewarganegaraan melalui kuat kuasa undang-undang tertakluk kepada pematuhan syarat dalam Bahagian III Perlembagaan Persekutuan (Kaedah-

kaedah Kewarganegaraan) 1994 serta perlindungan berkaitan yang berkuat kuasa.

Untuk makluman Ahli Yang Berhormat Sekijang, Perlembagaan Persekutuan mempunyai peruntukan khusus bagi membolehkan permohonan kewarganegaraan diterima daripada pemohon yang merupakan isteri kepada lelaki warganegara Malaysia iaitu di bawah 15(1) Perlembagaan Persekutuan.

Antara syarat yang ditetapkan bagi permohonan daripada golongan ini adalah permohonan tersebut perlu masih wujud dan berterusan serta pemohon telah memenuhi tempoh permastautinan melebihi dua tahun yang dikira daripada pemegang MyPR sebelum tarikh permohonan dibuat.

Dalam hal ini subjek tidak layak untuk mengemukakan permohonan kewarganegaraan di bawah Perkara 15(1) Perlembagaan Persekutuan memandangkan suami subjek telah meninggal dunia dan subjek juga tidak memiliki taraf permastautinan tetap. Sekian dan terima kasih Tuan Yang di-Pertua.

Tuan Yang di-Pertua: Terima kasih Yang Berhormat Timbalan Menteri. Ahli-ahli Yang Berhormat, dengan itu tamatlah sesi ucapan di bawah usul berkenaan perkara tadbir kerajaan mengikut Peraturan Mesyuarat 17 pada hari ini. Ahli-ahli Yang Berhormat semua, Mesyuarat Kamar Khas hari ini ditangguhkan sehingga pukul 12 tengah hari, hari Selasa, 10 November 2020. *Assalamualaikum warahmatullahi wabarakatuh.*

[Kamar Khas ditangguhkan pada pukul 12.20 petang]